



INFORME DE LEGALIDADE SOBRE O PROXECTO DE DECRETO POLO QUE SE MODIFICAN DETERMINADAS DISPOSICIÓN VIXENTES EN MATERIA DE AUGAS

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, e logo de examinar o “Proxecto de Decreto polo que se modifican determinadas disposición vixentes en materia de augas”, emite o seguinte,

INFORME

1.- Competencia e marco legal aplicable

O artigo 27.12 do Estatuto de Autonomía atribúe á Comunidade Autónoma de Galicia a competencia exclusiva en materia de augas, cando estas augas discorran integralmente dentro do territorio do seu territorio, sen prexuízo do disposto no artigo 149.1.22º da Constitución. E en base a este título competencial, a presente disposición introduce modificacións puntuais que afectan a distintas normas en vigor:

1º)Os artigos 4, 6 e 11 da Lei 9/2010, do 4 de novembro, de augas de Galicia, desenvolven a competencia de supervisión e control do ente público empresarial Augas de Galicia na zona de dominio público hidráulico e a súa zona de policía no ámbito da conca Galicia Costa.

Con carácter xeral, o texto refundido da Lei de Augas, aprobado polo Real Decreto Lexislativo 1/2001, do 20 de xullo, e o Regulamento do Dominio Público Hidráulico, desenvolve os títulos preliminar I, IV, V, VI e VII da Lei 29/1985, do 2 de agosto, de augas, aprobado polo Real Decreto 849/1986, do 11 de abril, regulan os procedementos para o outorgamento de autorizacións administrativas. E a disposición adicional segunda do Decreto 1/2015, do 15 de xaneiro, polo que se aproba o Regulamento da planificación en materia de augas de Galicia e se regulan determinadas cuestións en desenvolvemento da Lei 9/2010, do 4 de novembro, de augas de Galicia, prevé a substitución da autorización administrativa por unha declaración responsable, nos



supostos de actuacións menores de mantemento e conservación do dominio público hidráulico no ámbito da conca hidrográfica Galicia Costa, entendendo por tales as retiradas de árbores mortas, podas e outros elementos que reduzan a capacidade da canle ou contribúan a súa degradación.

2º) O artigo 24 do Estatuto da entidade pública empresarial Augas de Galicia aprobado polo Decreto 32/2012, do 12 de xaneiro, detalla o ámbito espacial de cada unha das zonas hidrográficas en que se divide o territorio de Galicia, remitíndose no apartado 3 aos planos que contén o anexo do estatuto.

E a Orde TEC/921/2018, do 30 de agosto, pola que se definen as liñas que indican os límites cartográficos principais dos ámbitos territoriais das confederacións hidrográficas de acordo co establecido no Real Decreto 650/1987, do 8 de maio, polo que se definen os ámbitos territoriais dos organismos de conca e dos plans hidrolóxicos, utiliza as mellores tecnoloxías dispoñibles para a traza cartográfica das liñas divisorias principais que delimitan o ámbito territorial dos organismos de conca, sinalando que deberá ser a utilizada de xeito que os ámbitos territoriais dos organismos de conca e as demarcacións hidrográficas deben adecuar e axustar as súas actuacións ao sinalado na cartografía a que se refire a orde.

3º) Por outra banda, o Regulamento marco do Servizo Público de Saneamento e Depuración de Augas Residuais de Galicia aprobado por Decreto 141/2012, do 21 de xuño, regula no anexo I os vertidos prohibidos, e no anexo II regula os vertidos limitados.

4º) Por ultimo, o artigo 149.1.18º da Constitución atribúe ao Estado a competencia exclusiva en materia de lexislación sobre expropiación forzosa, correspondendo ás Comunidades Autónomas a competencia de execución en materia de expropiación, cando estas se refiran a sectores do ordenamento ou ámbitos materiais que sexan da súa propia competencia, o que unido á potestade de autoorganización destas administracións, conduce á posibilidade de que as mesmas arbitren ou insten medidas lexislativas tendentes á creación, organización e funcionamento de órganos específicos aos que lles corresponda o exercicio daquelas competencias segundo os artigos 27.1 e 39 do Estatuto de Autonomía de Galicia.



En base a este título competencial, o Decreto 172/2018, do 20 de decembro, aproba o Regulamento de organización e réxime de funcionamento do Xurado de Expropiación de Galicia, que no seu artigo 2 h) prevé que este órgano exerza, ademais das funcións expresamente previstas, as que lle atribúa a normativa vixente.

O Real Decreto 849/1986, do 11 de abril, no título II, capítulo I, prevé que no suposto de imposición de servidumes de acueduto, estribo de presa e de parada ou partidor, en caso de en caso de desconformidade co importe da indemnización, o citado importe será fixado de acordo co disposto na lexislación de expropiación forzosa.

2.- Estrutura

O proxecto de Decreto estruturase do seguinte xeito:

- Artigo primeiro, que modifica o artigo 24.3 do Estatuto da entidade pública empresarial Augas de Galicia, aprobado por Decreto 32/2012, do 12 de xaneiro.
- Artigo segundo, que modifica o anexo II do Decreto 141/2012, do 21 de xuño, polo que se aprobou o Regulamento marco do Servizo Público de Saneamento e Depuración de Augas Residuais de Galicia.
- Artigo terceiro, que modifica a disposición adicional segunda do Decreto 1/2015, do 15 de xaneiro, polo que se aprobou o Regulamento da planificación en materia de augas de Galicia e se regulan determinadas cuestións en desenvolvemento da Lei 9/2010, do 4 de novembro, de augas de Galicia.
- Unha disposición adicional, sobre valoración de indemnizacións en materia de augas.
- Dúas disposicións derradeiras, referidas ao desenvolvemento normativo e entrada en vigor.



3.- Obxecto da disposición

Como se sinalou o do proxecto de decreto ten por obxecto a modificación de tres disposicións xerais:

- A modificación do artigo 24.3 do Estatuto da entidade pública empresarial Augas de Galicia, aprobado por Decreto 32/2012, do 12 de xaneiro, suprime os mapas dos ámbitos territoriais das confederacións hidrográficas que recollía o anexo, incorporando as previsións da Orde TEC/921/2018, do 30 de agosto, que se concretan no arquivo dixital das liñas divisorias principais que delimitan o ámbito territorial dos organismos de conca que publica o Ministerio para a Transición Ecolóxica no seu nodo da infraestrutura de datos espaciais, baixo a denominación «Límites cartográficos de las Confederaciones Hidrográficas».
- A modificación do anexo II do Decreto 141/2012, do 21 de xuño, polo que se aproba o Regulamento marco do Servizo Público de Saneamento e Depuración de Augas Residuais de Galicia elimina determinadas contradicións que contén en relación co anexo I, para os paramentos de ácido sulfídrico, ácido cianhídrico e cloro.
- A modificación da disposición adicional segunda do Decreto 1/2015, do 15 de xaneiro, polo que se aproba o Regulamento da planificación en materia de augas de Galicia e se regulan determinadas cuestións en desenvolvemento da Lei 9/2010, do 4 de novembro, de augas de Galicia, continua na liña de mellora e simplificación na tramitación administrativa que introduciu a citada disposición, que substitúea a autorización administrativa pola declaración responsable, no suposto das actuacións menores de mantemento e conservación do dominio público hidráulico. Con esta modificación ampliase o catálogo de actuacións menores suxeitas a declaración responsable, incorporando outro tipo de actuacións que, esencialmente, podemos definir como actuacións de mantemento e conservación de instalacións e infraestruturas xa existentes, sen alterar o seu volume, estrutura ou funcionalidade.
- Por ultimo, a disposición adicional única atribúe ao Xurado de Expropiación de Galicia a



competencia para determinar as indemnizacións pola imposición de servidumes de acueduto, estribo de presa e de parada ou partidor, en caso de en caso de desconformidade co seu importe, xa que áínda que a imposición destas servidumes non constitúe un suposto de expropiación por causa utilidade publica ou interese social, o Xurado de Expropiación de Galicia sería o órgano máis adecuado para a súa determinación, no ámbito da conca Galicia Costa.

4- Tramitación

A tramitación deste proxecto de decreto desenvolveuse con suxeición ao procedemento legalmente establecido, de acordo co disposto nos artigos 40 a 44 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia e no Regulamento de réxime interior da Xunta de Galicia, aprobado polo Decreto 111/1984, do 25 de maio:

- 1) O 15 de xaneiro de 2019 a conselleira de Infraestruturas e Mobilidade acordou o inicio da tramitación do Anteproxecto de decreto polo que se modifica o Decreto 1/2015, do 15 de xaneiro, que aproba o Regulamento da planificación en materia de augas de Galicia e se regulan determinadas cuestións en desenvolvemento da Lei 9/2010, do 4 de novembro, de augas de Galicia.
- 2) O Anteproxecto de decreto foi sometido a consulta publica previa entre o 24 de xaneiro de 2019 e o 7 de febreiro de 2019.
- 3) O 8 de marzo de 2019 a dirección de Augas de Galicia asinou as memorias xustificativa e económica do Anteproxecto de decreto polo que se modifican determinadas disposicións vixentes en materia de augas.
- 4) O 11 de marzo de 2019 foi emitido informe do Servizo Técnico Xurídico.
- 5) O 11 de marzo de 2019, a conselleira aprobou inicialmente o texto do Proxecto decreto polo que se modifican determinadas disposicións vixentes en materia de augas.



XUNTA DE GALICIA

CONSELLERÍA DE
INFRAESTRUTURAS E MOBILIDADE
Secretaría Xeral Técnica

Edificio Administrativo San Caetano s/n
15781 SANTIAGO DE COMPOSTELA

galicia

6) O 14 de marzo de 2019 publicouse no Portal de transparencia e governo aberto da Xunta de Galicia o Proxecto de decreto polo que se modifigan determinadas disposicións vixentes en materia de augas.

7) O 14 de marzo de 2019 o texto foi sometido a tramite de audiencia por un prazo de quince días hábiles.

8) O proxecto de decreto foi sometido informe da:

- Secretaría Xeral da Igualdade, emitido o 26 de marzo de 2019.
- Dirección Xeral de Avaliación e Reforma Administrativa, emitido o 17 de abril de 2019.
- Dirección Xeral de Planificación e Orzamentos, emitido o 10 de maio de 2019, previo requerimento de memoria económica complementaria de 29 de abril de 2019.

9) O 5 de xullo de 2019, foi emitido informe favorable da Asesoría Xurídica da Xunta de Galicia.

10) O 30 de setembro de 2019, o proxecto de decreto foi incluído na orde do día da Comisión de Secretarios Xerais, con carácter previo á solicitude de ditame ao Consello Consultivo de Galicia.

Á vista do texto proposto, a Consellería de Medio Ambiente, Territorio e Vivenda solicitou a celebración dunha reunión co fin de analizar concxuntamente o texto proposto en relación coa declaración responsable para a realización de obras menores na zona de dominio público e de servidume.

Resultado das reunións celebradas, introducíronse modificacións no proxecto de decreto, co fin de delimitar as actuacións menores que estando suxeitas a declaración responsable no ámbito da demarcación hidrográfica Galicia – Costa, constitúen usos permitidos pola lexislación medioambiental e as que ademais, requieren autorización dos órganos competentes en materia medioambiental.



5.- Acerto e oportunidade

De conformidade co anterior, e tendo en conta os aspectos analizados, o texto proposto reúne os requisitos legais esixidos pola normativa de aplicación, cumpríndose todos os trámites legais preceptivos, é polo tanto esta Secretaría Xeral Técnica informa favorablemente a legalidade, acerto e oportunidade do texto normativo proposto que deberá ser sometido, previo ditame do Consello Consultivo de Galicia, ao Consello da Xunta para a súa aprobación como Decreto.

Santiago de Compostela, 11 de decembro de 2019



O secretario xeral técnico
Joaquín Macho Canales

